

滇
繫

8243.1342.84

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 27 1936



滇繫書目

事略一冊全

趙州師範荔屏纂輯

軒轅氏

夏

商

周

前漢

後漢

蜀漢

晉

劉宋

蕭梁

隋

唐

五代

宋

元

明

國朝

海
東

滇繫

事略繫

趙州師範荔屏纂輯

哈佛大學漢和圖書館珍藏印

黃帝之嫡子昌意降居若水爲諸侯娶蜀山氏之女謂之昌濮氏產顓頊十年而佐少昊二十而卽帝位若水卽今金沙江

鯀娶於有莘氏之女名曰女嬉年壯未孽嬉于砥山得薏苡而吞之若爲人所感因而妊娠剖脅而產禹家于西羌地名石紐石紐在蜀西川也石紐卽今麗江府之石鼓

湯四方獻令曰西南產里里卽今車里百濮濮卽今順甯以象齒矩狗爲獻孔氏曰矩狗狗之善者也志作短狗非

周武王伐紂濮人會于孟津

濮今順甯

周王會白人

卽白子國

貢乘黃

似麟無角

卜人

卽濮人

貢砂

丹砂也

黑齒

卽永昌夷

貢白鹿

周成王初越裳氏獻白雉重譯而至曰吾受命國之黃耞曰久

矣夫天之無烈風淫雨海不揚波三年矣意者中國有聖人乎

盍往朝之及返迷失故道周公錫以指南車期年乃至其國

越裳

卽令老撾

春秋時庸與百濮伐楚又糜人率百濮伐楚

周末楚頃襄王使將軍莊蹻將兵循江上略巴黔以西至滇池

方三百里旁平地肥饒千里以兵威定屬楚欲報會秦擊破楚
黔中郡道塞不通因以其衆王滇變服從其俗以長之

秦使常頴略通五尺道頗置吏

漢武帝元狩元年命王然于柏始昌呂越人間出西南夷至滇
指求身毒國是歲有彩雲見於白崖遣使跡之乃置雲南縣
元鼎六年復使王然于以破越及誅南夷兵威風諭滇王入朝
元封元年郎中司馬遷奉使西征巴蜀南略邛筰昆明還報命
二年以中郎將司馬相如持節開越巂按道侯韓說開益州授
經教學復遣將軍郭昌衛廣平西南夷未服者舉兵臨滇滇王

降以爲益州郡賜之玉印最寵焉

六年漢旣通西南夷欲前往大夏而昆明閉殺使者奪幣物於
是天子赦京師亡命遣拔胡將軍郭昌將擊之斬首數十萬後
復遣使竟不得通

昭帝始元三年姑繒楪榆反遣水衡都尉呂辟胡一作破胡將兵擊
之敗還明年復遣軍正大鴻臚田廣明等並進大破之時句町
侯亡波同入滇擊反者捕虜有功封爲句町王

宣帝神爵元年遣諫議大夫王褒求金馬碧雞之神時方士言
益州有金馬碧雞之寶可祭祀而致上使褒往祠焉時蠻人叛

路莫能通乃就蜀巴郡醮祭移文及還道病卒土惜之
河平二年夜郎王興句町王禹漏卧侯俞相攻殺帝遣大中大夫張匡持節和解之句町不服刻木作漢使射之後陳立爲牂牁太守誅興禹乃降

天鳳六年越巂姑繒夷人叛殺略吏民莽遣將軍廉丹發巴蜀卒徒十萬擊之不克

光武建武十九年渠帥棟蠶姑繒楪榆弄棟諸羌叛益州太守繁勝退保朱提

十九年遣武威將軍劉尚擊諸叛羌平之

二十七年哀牢夷賢栗等率種人詣越雋太守鄭鴻降求內屬
封爲君長

明帝永平元年姑繒叛益州刺史發兵討破之斬其渠帥傅首
京師

十二年哀牢王柳貌率衆內屬以其地置哀牢博南二縣割益
州郡西部六縣爲永昌郡始通博南山度蘭滄水

十七年白狼夷入貢作詩誦漢功德益州刺史朱輔譯進之

白狼

今麗江也

章帝建初元年哀牢王類牢反太守王尋奔楪榆詔募發夷漢

討之

元和間神馬出昆明池甘露降白鳥見

和帝永元六年永昌徼外夷遣使譯獻犀牛大象
九年徼外蠻及撣國王遣重譯貢珍寶賜以金印紫綬小君長
皆加印綬錢帛

安帝永初元年永昌徼外焦僥種夷三千餘口內附獻象牙水
牛封牛

元初五年卷夷大牛種封離等叛永昌夷皆應之衆至十餘萬
遣中郎將尹就討之敗績詔徵就還令以兵屬益州刺史張喬

喬遣從事楊竦至楪榆擊大破之封離降

元甯元年擣國王復來貢獻樂及幻人

靈帝熹平五年殺永昌太守曹鸞

後主建興元年益州耆帥雍闔等反殺建甯太守成昂

三年改益州郡爲建甯郡以李恢爲太守分建甯永昌置雲南
郡以呂凱爲太守分建甯牂牁置興古郡以馬忠爲太守丞相
諸葛亮南征討雍闔斬之擒孟獲益州永昌牂牁越雋四郡平
卽其渠帥用龍佑那爲酋長賜姓張氏改號建甯

晉惠帝大安元年建甯朱提大姓毛詵等叛南夷校尉李毅討

破之

二年毛詭等復叛奉建甯太守馬恢爲刺史李毅收恢殺之而夷愈盛毅疾甚不能出嬰城固守而已

光熙元年甯州刺史李毅卒

懷帝永嘉四年以王遜爲南夷校尉甯州刺史滅五夷以地勢形未便分永昌爲梁水郡改益州郡爲晉甯郡從之

明帝太甯元年蜀李雄遣李驥寇甯州王遜遣將軍姚岳等擊大破之是年遜卒以其子堅爲甯州刺史

成帝咸和二年甯州秀方龐遺起義兵攻李雄將任回李謙等

雄遣將羅恒等救之刺史尹鳳遣裨將姚岳太守楊術援遺戰于臺登敗績術死之

八年李雄陷甯州

宋文帝元嘉十八年晉甯太守益松子舉兵反甯州刺史徐循討平之

梁武帝時建甯越雋叛都督王紀撫定之

武陵王蕭紀也

天監十二年殺甯州刺史李略

太清三年甯州土酋爨瓚據城以叛詔授瓚甯州刺史時侯景方亂不能討也

隋文帝開皇十四年南甯夷爨翫反遣太平公史萬歲討之自
靖蛉川度西洱河入渠濫川破三十餘部爨翫降

十八年南甯羌復反萬歲以受賂坐除名

唐高祖武德元年以爨翫子宏達爲昆州刺史

四年昆彌遣使內附

七年命韋仁壽檢校南甯州寄治越雋仁壽將兵循西洱河開
地置七州十五縣請徙治南甯州詔可

太宗貞觀元年以爨歸王爲南甯州都督

三十二年命右武衛將軍梁建方討松外諸蠻遣使詣西洱河

諭其帥楊威等皆欵降是年西洱河大首領楊棟等皆入朝授
官秩冊建甯張樂進求爲首領大將軍進求尋遜位於蒙氏
高宗永徽元年遣左領軍將軍趙孝祖討白水蠻及大勃弄小
勃弄大破之虜其酋長楊承顥改雲南縣爲匡州
四年蒙氏細奴羅遣使入朝賜以錦袍

五年西洱河蒙儉和舍等作亂以李義爲姚州道總管討之斬
其帥諾沒弄楊虔柳等諸蠻悉平

顯慶元年西洱河大首領楊棟來附

麟德元年置姚州都督府於昆明之弄棟川

咸亨二年永昌蠻寇邊殺長史李孝讓辛文協詔以太子右衛

梁積善爲姚州道行軍總管討平之

調露二年永昌蠻復叛上命李義復總師討之敗績郎將劉惠等戰死乃廢姚州

武太后垂拱四年南蠻郎將王善寶昆州刺史爨乾福請復置

甯州

延載元年永昌蠻酋董期帥部落二萬戶內附

神功二年蜀川刺史張柬之乞省罷姚州使隸嶲州不納

睿宗景雲元年姚州附吐蕃攝監察御史李知古請發兵擊降

之增置州縣羣蠻引吐蕃攻知古殺之姚雋路絕

太極元年姚州蠻寇蜀詔靈武監軍右臺御史唐九徵爲姚雋道討擊使吐蕃以鐵綱梁漾濞二水通西洱蠻築城戍之九徵毀經夷城建鐵柱於江上以勒功

玄宗開元二年南詔晟羅皮遣張健成入朝迺築拓東龜城

姚雋蠻寇姚州都督李蒙討之敗沒

三年晟羅皮立孔子廟於國中

十七年鄯州都督張審素討西南蠻破之克雲南昆明城

十八年南詔皮羅閣滅五詔

二十五年皮羅閣陷太和城又襲大釐城據之

二十六年皮羅閣賂節度使王昱求合六詔爲一許之遣使冊爲雲南王賜名歸義徙治太和城

天寶元年南甯州諸蠻叛陷安甯命御史韓洽等督蒙歸義討平之

五載歸義遣其孫鳳迦異入朝授鴻臚卿

入載遣特進何履光率十道兵定南詔境

永昌人楊興爲蒙氏布燮率所部內附上降璽書褒美旌其門

世爲永昌酋長

九載楊國忠以鮮于仲通爲劍南節度使雲南太守張虔陀淫虐南詔閣羅鳳遂陷雲南僭號大蒙國

十二載復遣劍南留後李宓擊蒙氏於西洱河全軍敗沒前後死者二十萬人閣羅鳳因陷嵩州會同軍據清溪關以破越析肅宗至德元載南詔陷越巂

代宗大歷十四年閣羅鳳死孫異牟尋嗣連吐蕃入寇神策都將李晟擊破之

德宗貞元元年異牟尋徙居史城僭封五嶽四瀆以點蒼山爲中嶽烏蒙山爲東嶽蒙樂山爲南嶽高黎共山爲西嶽玉龍山

爲北嶽以黑惠江金沙江潞江瀾滄江爲四瀆

四年異牟尋徙居羊咀咩城請內附

五年南詔遣烏蠻鬼王夢衡苴聘於劍南節度使韋皋求入朝
皋遣其屬崔佐時報之盟于黠蒼山

九年南詔遣使上表詔冊封雲南王以韋皋爲雲南安撫使異
牟尋遣使楊嘉明詣皋獻夷中歌皋遣幕府崔佐時由石門趣
雲南復通石門南道

十年皋以南詔兵伐吐蕃大破之取鐵橋十六城俘其五王來
獻捷異牟尋遣弟獻地圖土貢請復號南詔詔以袁滋爲冊使

賜以金印

十一年南詔尹輔酉等隨袁滋入朝九月復獻馬六十四頭
十六年南詔進奉聖樂舞上御麟德殿觀之

憲宗元和十一年南詔勸利晟寇安南

穆宗長慶四年始賜勸利晟印是歲勸利晟死弟豐佑嗣朝廷
遣京兆少尹韋審規持節臨冊豐佑遣洪成酉等入謝

文宗太和三年南詔入寇陷邛戎竊遣東川節度使郭釗以鄂
岳襄鄧忠武軍伐之又寇成都入其郛遣右領軍董質伐之豐
佑上表請誅西川節度使杜元穎詔貶元穎爲循州司馬

四年豐佑遣使請罪

五年西川節度使李德裕索南詔所掠百姓四千人

六年南詔掠驃國民三千徙之拓東

八年南詔遣使貢方物

武宗會昌六年南詔寇安南經略使裴元裕死之

宣宗大中十二年南詔寇安南陷都護府發朱弩怯苴助守猶
歲朝貢

十三年豐佑死子酋龍嗣朝廷以名近廟諱不行冊禮酋龍遂
僭號改國號曰大禮陷播州

懿宗咸通元年南詔遣清平官董成等詣成都節度使李福囚之劉潼釋之有詔成等至京師見別殿遣還

二年南詔寇安南攻陷邕州是年九月以左司郎中孟穆爲南詔弔祭使不果行

四年南詔掠蜀州四川節度使蕭鄴大破之又寇邕州官軍敗沒

七年嶺南節度使高駢大破南詔復取交趾

八年南詔遣楊酉慶來謝釋董成之囚且歸成都俘三千人節度使李師望殺其使

十年南詔入寇陷嘉黎雅三州

十一年攻成都節度副使王建立戰死

十四年陷黔中是年以牛勗爲劍南西川節度使南詔謾書求入朝假道叢囚其使四十人釋二人還

僖宗乾符元年南詔寇西川陷黎州入邛崐關

二年寇雅州西川節度使高駢檄之

四年酋龍死子法嗣請和親

六年嶺南節度使辛讜遣使徐雲庚如南詔

廣明元年遣宗正少卿李龜年使南詔與和親

中和三年以宗室女爲安化公主妻南詔遣趙隆眉楊奇鯤段
義宗朝行在高駢上言三人南詔心腹宜止而鳩之上從其言
隆眉等死蠻遂衰不復振

昭宗天復二年南詔清平官鄭買嗣奪蒙氏而滅之僭號大長
和國後梁乾化四年南詔寇蜀王建發兵大破之

後唐莊宗同光元年南詔以朱彞白馬求婚南漢南漢以增城
公主妻之魏王繼岌齊書招諭南詔

明宗天成元年東川節度使楊千貞殺南詔鄭隆亶立侍中趙

善政

二

三年趙善政僭號大天興國于貞尋廢之自立僭號大義甯國
後晉天福元年通海節度使段思平討于貞于貞走死

二年段思平自立僭號大理國居牟苴咩城

三年南詔段思良廢其主思英而自立

宋太祖至道元年南蠻酋長龍漢瑰貢方物

太宗淳化五年李順亂蜀招安使雷有終遣辛怡顯使南詔

英宗治平二年蔣波繡雲龍賜等州蠻來貢

波州今劍川雲龍即今雲龍州也

神宗熙寧九年南詔廉義遣使入貢後爲其臣楊義貞所弑

元豐三年段氏臣高智昇討義貞誅之立廉義之子壽輝善闡

侯高昇泰廢之立思廉庶孫正明

五年高昇泰廢其主正明而自立

哲宗紹聖元年昇泰僭號大中國昇泰死子明以父命求正明弟正滔立之號後禮國

徽宗崇甯二年正滔遣高泰運入朝求經籍得六十九家以歸

按乾道中南詔使者見廣南人言其國有五經廣註春秋後語三史家註諸書

政和五年廣州觀察使黃璘奏大理求欵附

七年南詔遣進奉使天駢爽彥貴李紫琮副使坦綽李伯祥來朝貢馬三百八十匹及麝香牛黃細檀碧圩山諸物詔冊其主

和譽爲大理國王

按宋史作段和譽南詔通紀作段正嚴

高宗紹興三年廣西奏大理求入貢郤之

六年廣西經略安撫司奏大理貢象馬詔護送行在所優禮答

之

孝宗淳熙二年知靜江府張栻令邕管提舉司精選峒丁以制
大理

八年大理封其相高護子隆政爲姚府等三郡演習

演習華言牧守也

理宗淳祐元年黎守闔師古言大理請道黎雅入貢安撫使孟

珙卻之使道邕

四年蒙古攻靈闢大理將高禾逆戰敗死

十二年元太弟擊大理由臨洮踰吐番抵麗江所至望風欵附
寶祐元年元太弟入大理相國高泰祥死之擒其主段興智仍
命安輯大理

二年元兵克昆明遂定雲南諸郡以蠻部三十六路四十八甸
皆設土官命大理金齒都元帥府統之

元世祖中統元年段興智入朝道卒以子信苴目爲總管守大

理南詔通紀作智
興族弟信苴實

至元二年諸爨部叛信苴日討平之

四年以皇子忽哥赤爲雲南王鎮中慶路

今雲南府

雲南都元帥寶合丁毒殺忽哥赤王府文學張立道遣人告變
詔逮至皆伏誅

十四年遣信苴曰伐永昌之西騰越蒲蠻阿昌金齒未降部族
十九年遣大卜相答吾兒率師從金齒征緬

二十五年以雲南王也先鐵木兒鎮大理

二十六年始立迤西各路宣慰等司

二十七年以皇孫甘麻刺爲梁王鎮雲南

三十九年改封甘麻刺爲晉王

三十年以皇曾孫松山爲梁王

成宗大德五年調雲南軍征八百媳婦雲南土官宋隆濟叛

八年遣薛超兀等兵伐金齒諸蠻

六年宋隆濟攻貴州遣也速解兒會劉國傑討平之

武宗至大元年以諸王老的襲封梁王

梁王伐大理破總管段光兵殺其將高蓬

泰定帝元年封帖木不花爲梁王

文宗至順元年雲南諸王禿堅叛陷威楚臨安僭號雲南王詔
置雲南行樞密院以徹里帖木兒知院事率師討之

二年雲南平

順帝至正二十三年明玉珍紅巾賊攻雲南總管段功擊大破之梁王以女阿禮妻功爲奏授雲南平章無何忌而鳩之阿禮及從官楊淵海皆從死子段寶嗣此順帝至正二十三年癸卯年事也今志作成宗癸卯差一甲子誤矣

二十七年梁王攻大理不克奏陞段寶爲雲南左丞
前明洪武初段寶遣段眞奉表歸欵

五年遣翰林侍制王禕

八年遣中書省知政事吳雲俱招諭雲南王不下死之

十四年秋七月命潁川侯傅友德爲征南將軍永昌侯藍玉西平侯沐英爲副總兵征雲南平之梁王投水死

十五年三月克大理俘段寶一孫遂下鶴慶金齒諸路是年六月元普顏篤復叛據佛光寨先不華陷鄧川十月金齒土官高大惠拜也先虎都構麓川夷入寇屠永昌

大理土官高生等叛圍雲南都督郭英討平之

十六年征南將軍傅友德都督郭英擊普顏篤大破之篤自焚死大惠逃爲白人所殺

十七年移中土大姓以實雲南是年廣南特磨道作亂總兵沐

英討平之

十八年段土官復叛指揮李觀討平之

十九年命傅友德耿炳文再征雲南諸蠻平之

二十二年緬蠻叛總兵沐英往討大敗之生獲象四十七而還
五月命潁國公傅友德率兵再至雲南討曲靖普安孟定龍海
曲麻馬乃等處未靖諸蠻

二十二年廣西府阿赤部酋者滿矣情搆越州土酋阿資以叛
西平侯沐英討之誅者滿矣情獨阿資不獲

二十八年西平侯沐春降越州斬阿資梟其首誅其同惡者一

百四十一人

二十九年甯遠州刀拜燭麓川蠻刀干緬俱叛逐宣慰思倫法
遣西平侯沐春討之

三十一年夏四月麓川平

永樂元年車里宣撫司土酋刀邏答侵地虜官西平侯沐晟請
討之上勅晟以理告諭邏答悔懼還所虜及地遣使人謝

三年遣沐晟征八百大甸平之

四年遣官招諭雲南西南夷大古喇小古喇等部落皆願內屬
置宣慰司二長官司五

緬甸攻孟養遣行人張洪持諭之旨慰使那羅塔遣使謝罪詔
宥之

十年封汝南王於大理

後以遠改封今點蒼山無爲寺有王碑記

洪熙元年戶部尙書夏原吉上言時政請罷雲南採辦金寶數
事許之

正統三年麓川曾思任法

法夷言王也志作發誤

反征南將軍黔國公沐

晟討之不克都督方政戰死

晟駐師怒江思任法陽請降晟信之不進兵方政屢請戰不許政遂

與麾下夜往襲其柵破之既而蠻兵大集政求援不答一軍俱歿事聞上遣使問罪晟曰我主將也失律在我遂不食至楚雄卒上憐之溝其罪仍賜贈謚遣行人

祭政贈威遠伯謚忠毅立祠永昌

五年秋七月廣南維摩師宗沙人儂人作亂都督沐昂討平之
六年夏五月遣都御史王驥定西伯蔣貴太監曹吉祥等統東
南兵十五萬征麓川思任法逃獲其妻妾象馬寶玉無算時維
摩州蠻韋郎羅作亂移師平之還朝驥封靖遠伯貴進侯爵其
他陞官職者四十餘員

八年秋蔣貴王驥等以征麓川爲名再入雲南

九年秋七月緬人獲思任法函其首獻于軍

十三年靖遠伯王驥帥師復征麓川河西學教諭詹英上章劾
其濫行爵賞老師費財乃班師

景泰二年緬人執麓川思機法獻俘

成化十六年遣都御史程宗撫猛密故木邦部落也其地有寶井成化初木邦宣慰罕罕淫虐猛密曾囊罕弄遂叛投緬既而鎮守太監錢能王舉索寶石不得疏於朝請征之罕弄懼重賂大學士萬安遣宗撫處宗承安意盡以所略木邦地界之孟養諸番不平洶洶欲亂適宏治改元安宗斥罷副使林俊始割其地還木邦語具田汝成炎徼紀聞

宏治三年徐甸鐵索等作亂官兵討平之
思任法子思祿攻猛密取蠻莫等十七寨遂據孟養

嘉靖五年孟養思倫法攻緬甸破阿瓦城虜其宣慰莽紀歲殺略無算遂與木邦瓜分其地蓋以報執思任法之怨也詔遣永昌知府嚴時泰往諭之不聽

六年尋甸酋安銓及武定酋鳳朝文叛圍雲南命兵部尙書伍文定討平之

十年巡撫歐陽重以衛軍冒餉飲而核之軍士大譟詔罷重官十九年雲南衛舍人把天持等謀作亂伏誅

三十六年永昌枯柯夷作亂兵備副使韓撫定之

三十九年元江土舍那鑑弑其主憲而自立都御史石簡討之

不克

三十年那鑑殺左布政使徐樾時鑑詐降樾受命往撫之入賊境伏發被害官兵從者殲焉詔贈其官逾年官軍大集鑑乃自殺

是年緬酋莽瑞體據古喇宣慰司殺其酋長遂入孟養八百老

撾瑞體莽紀歲幼子避思倫法難奔洞吾與古喇相近古喇曾兄弟相攻瑞體和解之遂部署其衆絕其道路二酋皆死盡

有其地緬自此始強

三十七年木邦宣慰罕拔與隴川宣撫多士甯相讐殺遣指揮路九萬撫之

三十九年東川土酋阿堂與霑益土官安九鼎相攻殺巡撫都御史游居敬集師討之爲巡按御史王大任所劾詔逮居敬赴京下獄論戍

四十年詔取點蒼屏石五十於大理巡撫都御史蔣宗魯奏罷之

四十二年易門賊李向陽等作亂自稱混天大王掠安寧三泊等州縣南安泥叢諸賊響應巡撫都御史呂光洵討平之四十三年武定酋鳳繼祖叛殺略無算

隆慶元年巡撫雲南尙書呂光洵討武定酋悉平之奏設流官

改治立守禦建學作城

六年隴川宣撫司目把岳鳳弑其主多士甯投緬

萬曆元年冬十一月命巡撫侍郎鄒應龍同黔國公沐昌祚西
征鐵索等赤石崖擒夷酋羅勤快等七十二村悉平

二年春二月復東征狃濮等夷秋八月征裔甸等夷皆平之立
營戍守

四年緬大舉攻迤西副使羅汝芳遣兵援之大破其衆瑞體遁

去

七年緬破迤西據之

十年岳鳳以緬兵破于崖執土婦罕氏是時莽瑞體死

瑞體生時值大

雪惟瑞體屋上獨無夜所居室爛爛有光及長沈鷺狡謫善用兵信賞必罰故以亡命拓地萬里演爲之敵死子應裡嗣尤險詐有謀略瑞體拓疆多其力云

十一年緬酋莽應裡糾隴川賊岳鳳寇順甯破施甸猛琳蓋達諸寨殺略無算詔以劉綯爲遊擊將軍鄧子龍爲叅將會諸夷兵大破之斬岳鳳應裡遁去

十三年羅雄州土舍者繼榮弑其父者濬而自立巡撫都御史劉世曾討誅之初者濬悅營長之婦殺其夫而奪之踰年生繼榮稍長卽欲殺父濬幽之十餘年旣老無子欲以爲嗣釋之出

出卽據州逐父當事往諭乃佯迎父歸竟弑之招集亡命出刦
師宗維摩等州世曾乃遣遊擊將軍劉綰及守備張先聲等合
兵討之繼榮敗欲走交趾先聲追斬之奏改羅雄爲羅平

十五年應裡復攻廸西陷密堵送速二城既而巡按御史蘇贊論材上首級
遊擊劉天俸擊破之復二城既而巡按御史蘇贊論材上首級
不實詔逮材及故永昌知府陳嚴之同知宋儒騰越州知州陳
克侯等下獄材謫戍嚴之等皆削籍密堵送速二城雖廸西屬
來告急同知宋儒難之兵備李材方喜立功遣天俸等督兵往
援天俸亦憚行令把總杜斌李朝以少兵往而多以中國旗幟
授廸西兵緬見謂漢兵大至驚潰思威追擊大破之斬首千餘
天俸遂以爲功報捷材以上聞及驗級則夷兵不知取級往返

二千餘里半已烏有材等遂得罪既而廻西遣人貢方
物入謝而御史疏業已發乃刪削其表文進故獄竟具

十七年征緬歸兵作亂討平之初劉鄧二帥入滇多募亡賴子弟及西事粗定議令散去人給三金衆以爲不足官復逼之發遂大譟行刦而東至楊林漆文昌往諭賊不聽幽之空室漆從地道出遂合甯州土官祿華詰等兵殲之

十八年緬入孟養

二十年緬入蠻莫鄧子龍擊却之

三十一年緬入蠻莫破等練與猛卯多倫分道入寇巡撫都御

史陳用賓遣兵擊走之

是年巡撫都御史陳用賓城八關於騰衝曰萬仞曰神護曰巨石曰銅壁曰鐵壁曰虎踞曰天馬曰漢龍每四關設一守備戍之自是緬不敢深入皆廣南知府漆文昌之功

二十二年擒多俺及其子皆斬之用賓復檄暹羅同攻緬緬疲於奔命自此邊患少息

西韃虜寇臨西麗江知府木旺擊破之

二十三年大侯州土酋猛廷瑞叛討平之改置雲州詔逮叅政李先著下獄猛廷瑞之叛也與其妻父奉學興兵攻堂兄思賢所過州縣殺掠無算巡撫都御史陳用賓疏請征勦遣叅將吳

顯忠直抵順甯破賊衆圍之廷瑞困急乞降而先著聞有旨令廷瑞擒奉學自贖遂令撤兵廷瑞得遁入觀音山勢復振顯忠乃再集兵討之誅奉學虜廷瑞檻送軍門用質謂先著受賄縱賊以狀聞逮下詔獄死

二十六年車里老撾耿馬孟養等各入貢

採雲南諸礦

二十七年緬攻孟養官軍往援破走之

二十九年蠻莫酋思正作亂焚掠千崖隴川

三十年緬攻蠻莫思正奔騰越伏誅

三十一年緬酋雍罕遣使欵貢

三十三年五宣慰司又爲緬所陷

三十四年正月指揮賀世祿梁高門等率衆攻太監楊榮殺之
焚其屍時榮縱放爪牙四索金寶夷漢洶洶又日鞭責諸弁故
乘衆怒戮之及其黨百餘人皆死事聞詔誅首亂者餘勿問

三十五年隴川宣撫多安民叛歸緬殺鎮撫林承恩十一月武
定土酋鳳克叛陷郡城脅推官白明通索府印遂圍雲南巡撫

陳用賓以印予之迺解

雲南承平日久武備單弱上下束手無策而賊勢張甚用賓取和藩司薛夢雷

持不可既而賊日盛勢已不支索印竟予之及用賓得罪夢雷亦解任以其議不堅也

三十六年正月鳳克陷祿豐殺知縣蘇夢暘又陷元謀羅次嵩
明等諸州縣殺略無算用賓尋發兵討平之俘克等檣送京師
既而言者交章論用賓棄印及總兵沐徵等失機罪詔遣緹騎
逮治及都司張名世武定知府陳典推官白明通祿勸知州黃
榜俱下獄論死用賓在滇十六年其防西事最悉至於建關堡
營屯田檄暹羅以分緬勢俾騰永之間帖席者二十餘年功亦
懋矣而變起肘腋倉皇失措遂至身名俱殞悲夫蓋嘗竊論滇
事若游居敬無功而無罪者也李材李先著罪少而功多者也
用賓功罪相當者也而皆身嬰縲紲或以喪軀任事之難不其

然乎

三十七年多安民伏誅隴川平是年雲龍州土官段嘉龍縱妻虐夷爲族舍段進忠所殺

四十一年喬甸賊攻宜良知縣龔著擊却之時諸賊皆黔國莊丁節年流刦州縣官莫能捕而宜良庠生梅友竹者亡賴爲縣所踪跡遂購賊至著以死守城募鄉民擊賊破之賊散去捕友竹於通海戮之

四十七年水西賊掠霑益守備方策禦之敗績時烏撒土官安效良娶水西女不相得水西攻之效良逃至霑益賊亦追至扣

城索效良方策易之出戰兵寡爲所破僅以身免賊遂大掠而去

四十八年雲龍州平段進忠旣弑其主時議務羈縻之而進忠
愈肆猖獗逼晉州官殺掠無忌於是巡撫中丞召諸道兵欲勦
之進忠窘急從間道趨永平至龍尾關分守道與大理守謀誘
入關而擒之檻送軍門散其餘黨數百人疆理其地定賦稅焉
泰昌旣卽位巡撫沈微炌請減貢金以蘇民困遂奉上諭云今
旣稱北方加派遼餉措處維艱特允所請准將每年貢金蠲免
二千金仍進三千兩戶部知道貢金之數原二千萬歷十八年特旨加三千時在京任諸紳往

白司徒郎闢中楊君應宿唯唯詰旦入言于大司農蒲阪楊公曰雲南增貢金事某職掌也當力爭楊公卽令具疏上請有旨免一千兩再有瀆陳仍如數增大司徒謂彼此相傳姑无言竟以言者未已仍增爲五千節經撫按請免不報至是俞撫臣言八月題裁大理府白崖督捕通判一員金齒打牛坪雲竜甸巡檢三員設守備一員于皎甸統兵三百爲四小營防守禦寇天啟元年九月四川永甯土酋奢崇明奢寔貴州土舍安邦彥相繼迭叛兩省各移白便宜發兵赴救十月巡撫倣炌調合省士兵于曲靖以按察副使黃似華監紀並援黔蜀十二月遣都司李天常指揮黃懋勛張神武等統甯州嶍峨漢土兵四千援黔師次安莊衛疊水巖官軍陷沒天常死之懋勛神武俱被害

嶧峨土官祿崇功子培被執

二年正月遣都司楊明廷統兵三千援蜀師次畢節會烏撒土
酋安效良以助逆先伏兵阻截我兵敗績明廷並中軍程坤死
之指揮蔣藩屏百戶盧應藩奉差指揮朱家相張聯斗縋城出
走弗及俱爲賊所殺叅將尹啟易統兵四千次烏撒聞效良叛
退保交水二月霑益土婦設科惡目補鮮奈科李賢期曲等叛
焚劫露倘炎松交白六站堡

設科李賢等陷平夷殺管探指揮曹三捷及軍民數百衆失衛
所五印掌印指揮唐九官千百戶等被刦奔逃

武定夷目張世臣糾小東川夷賊千餘攻陷他頗補知二營殺管營武舉官陳竭忠

巡撫沈徵炌便宜起原任叅將李思忠督兵赴武定防守三月添設武尋遊擊一員倘匈守備一員其需平改匈守備俱改遊擊

東川土酋祿千鍾及祿阿伽張世臣帥兵數千與設科等合攻松明知州王育德率軍民固守官兵先至者犒賞安插便宜留之

巡撫沈徵炌便宜起原任叅將袁善督守備金爲貴士官沙源

至米馬爲貴衝鋒首擊賊衆斬級千餘賊退
袁善又計擒倘甸夷目阿托按獲爲美縣印一有元至正年號
賊攻嵩明袁善督沙源等兵至狗街大戰斬東川七州土官一
人其餘首功一百五十餘級賊屢經挫衄回巢遣夷目出倘甸
乞降許之

設科等率兵入陸涼州境焚劫各鄉知州郭俊義統兵出禦兵
敗死之

武定賊張世臣阿歹阿堯張拱漢等脅撒裡等夸民叛政府城
知府胡其慥帥兵民守陴參將李思忠領甯州祿傅祿洪等漢

士兵與戰大敗之斬首四十餘師進撒甸撒麻邑撒理環州等

砦追剿各賊弁各叛夷前后擒斬二百餘級各賊就擒惟張世

臣遁匿

張世臣最號凶悍與東川烏撒有婚姻之好阿瓦等鳳
克之餘裔也是役實爲尋甸犄角且以我爲不能兩應

耳一戰勝后迎刃而解世臣遂鼠竄

四月遣叅將尹啟易守備李加培周嘉暎自交水督兵進霑益安勅良親統水西烏撒兵拒戰我兵陷沒奪去貢象三加培嘉暎俱死之

七月補鮑安應甫等攻陷亦佐焚燬縣治民居知縣封存章逃

赴廣西府

八月補鮑攻越州焚割關廂村屯巡撫沈徵炌發曲靖兵往援
九月補鮑阿九安應竜等賊攻竇平州所署印通判梅守聘千
戶傅畀重等率兵民守城賊焚關廂攻城六日不克引去

十月安効良兵入霑益軍民降附奔逃同城烏撒衛后所千戶

劉受祿等弃城投交水

交岡犯安南長官司竇古哨土官舍沙源等與新安所官軍堵
截斬交兵戰聚交人遁歸

十二月阿九安應竜等圍羅平兩月不解州縣縋城以血書告
急巡撫閔洪學遣同知李聲揚統土官竇在田等兵往援遣叅

將施翰統土官沙源等兵策應

三年正月補鮑阿九安應龍等攻破阿邦等砦復攻師宗城聲揚等力禦勝之賊退扎偏頭山二月官兵攻阿邦此得等砦斬賊四百八十餘級

賊首補鮑阿九安應龍等復攻州城官兵斬賊七十餘級賊敗退應襲白醜如土舍吾必奎追之各斬賊首有差是月奉旨暫停本省貢金候事平仍進

三月巡撫閔洪學遣副使黃似華于羅平監軍遣遊擊李思忠

于師宗策應

江寧
檄施翰等兵鵬勦補鮓偏頭山等賊斬獲二百餘擒曾邑叛首
施恩遠

四月計擒羅平賊首阿九父子等于法于寨殺之是月巡撫閔洪學檄叅將施翰乘勝追勦補鮓安應龍等至亦佐擒酉婦隆氏拔歸順坎者蘆塘三營至普安擒應麒及安應龍妻屬斬馘三百餘級師還勒石除羅平苛政七十二欵羅平名夷之亂也由有司橫征無藝歲額之外溢千三百餘金而諸色橫索尤甚民不堪命亂所从来矣勒石除苛政七十二欵夷漢相慶不問可知

巡撫閔洪學遣叅將袁善率兵恢復平夸衛城弁白水站收招流散屯種如故五月建交水城移平夷右所官軍守之

改安甯提舉司爲琅井提舉司駐琅井安甯鹽課附州征解
水西普安賊兵萬餘攻平夷守將袁善用銃擊賊斬級元數賊
焚屍塋祭而去善又督兵攝之由牟陽亦佐越州賊復遁

七月建平奪衛城及白水站土垣

八月巡撫閔洪學發兵兩路援黔左布政使謝存仁督兵由黃
草壩新城馬乃安南所進沿路剿撫斬級五十餘叅將袁善督
裨將王聘選張雲鵬等統兵由亦資孔普安進襲土官營斬八
十八級擒賊首段二

九月袁善兵抵安南圍解守將許成名揚文炳郊迎犒師出帑

銀千三百兩賑城中軍民

十月水西歸濟比恰弁普安賊萬餘截滇兵于江西坡土官守備沙如玉單騎冲鋒賊敗官兵乘勝掩殺斬賊一百三十餘級奪器械无算

閏十月收復新興普安弁平夷樂民亦資孔等站

十一月攻破八納山斬普安賊首尹玉保及餘賊七十餘級露

益叛首設科李賢就擒

設科安邦彥之妹安効良與之通李賢爲之用破霑益平彝炎方等州衛驛站

戕我職官殺官軍百姓无算至是兵備右參議王鏌叅將尹啟易計擒之

檄經厯魏天命之亦佐縣守招流散被擄人民七百有奇撫定

夷砦一千六十有奇取其親子爲質補三年逋負築城守之
四年二月遣副總兵袁善督兵鵬剿霑益哈馬谷斬賊三十級
三月水西賊入普安界副總袁善督兵堵截于簸箕羅朋七家
等砦斬賊級四十有一

四月鵬剿霑益革泥法墮以那冲等砦擒斬俘獲共二百餘
七月檄武學官李瑗率兵襲叛首張世臣于他頗賊黨勢孤斬
世臣執其妻及子武尋賊平

八月新化州新平縣賊首魯魁魯克等潛伏山箐巡撫閔洪學
檄分守臨元副使胡其慥遊擊劉崇禮分兵搜捕俘斬二百顆

有竒餘黨悉降就地安插立十二哨戍之而還

十一月巡撫閔洪學遣裨將吾必奎等統兵恢復炎方驛招集其民

十二月朔黔國公沐昌祚卒是月烏撒土酋安効良縛亦佐縣賊首安應龍分貴州烏撒衛經歷司各印信來獻勞其使而歸之還至曲靖府城外被殺

五年二月巡撫閔洪學遣副總兵袁善統兵復霑益州城修復松炎遷倘四驛站堡

三月安効良忿來獻功人見殺又因我兵進復霑益遂斜水藺

二酋擁衆入犯我兵止六千人賊數甚夥分兵一圍霑益一攻
炎方副總兵袁善督宣撫沙源力戰勝之賊不能窺霑益守備
吾必奎堅守炎方以老其師袁善等乘勝間出炎方內外夾擊
又勝之于炎方前後五戰計斬級三百四十有奇他死烏銃者
無算賊遁去

四月發兵霑益勦捕賊黨竚更斬賊級八十有奇俘賊屬牛羊
有差

五月安効良復納水西兵入寇巡撫閔洪學率左布政使謝存
仁副總兵袁善合尹啟易督守備郝太極宣撫沙源率兵堵截

是月戊午賊前鋒遊騎至馬竈與吾兵適相遇賊騎見戰象而驚我兵襲擊賊自蹂躪授首已未戰于磨拏山至甲子首尾五日斬賊級共二千有奇賊从間道走尋甸官兵追及戰于鳳梧山下殺傷相當賊遂由山頂分兩路遁走我兵又躡其后又伏兵截其歸路斬數十級賊負山連營聲言十餘萬我兵僅萬人又遂取別路而歸是役賊負山連營聲言十餘萬我兵僅萬人又密遣馬龍酋戈資齎金投賊爲之鄉導賊縱橫曲馬之間反敗走尋甸度竈勝江或从船或从七星橋又途窮于鳳梧路塞于東川而指示逕竄導之出疆皆戈資之爲也比調集景東兵象

如干廣南銃手如干及赤石崖毒弩手俱入會城黔兵已入滇
境而賊一夕遁去矣賊退遣人賚金帛諭東川購戈資獻軍門
數其罪逆斬之傳首諸夸六月从撫按之奏請以沐啟元爲征
南將軍黔國公鎮守雲南

崇正三年黔國公沐天波巡撫王伉巡按甘學潤屯兵曲靖勦
安効良設科餘黨雞世昌平之

四年王伉統滇黔蜀土司吾必奎等屯兵臨安以討阿迷土酋
普名聲初名聲爲馬者哨哨頭水烏之亂與沙源吾必奎等俱
奉調率兵破賊有功旣而隨御史傅宗龍授黔及宗龍以內艱

歸名聲亦回授阿迷土知州日益驕蹇後巡按御史趙洪範至
臨安名聲率兵迓之戈甲旗幟列數里洪範惡之貽書巡撫王
仇謂其養癰仇亦習聞名聲不法時甯州土官祿混與名聲互
許人傳仇欲勦名聲名聲懼乃詐爲祿土官家人訴名聲于仇
以覘虛實仇果有卽討之言名聲遂反仇奏請檄調黔蜀兵會
討以右布政使周士昌監軍擊名聲敗之進圍阿迷名聲使人
以重賄誘吾必至復使其下僞約降王仇遣名聲故交莊承差
往諭名聲留之佯使人告急且密語左右曰官兵四至皆不慮
但從某筭入甚爲可憂莊得名聲語歸告仇仇不知爲計遂遣

將朱永吉往攻某等伏發必奎賣陣先走全師皆陷士昌歿於陣永吉亦力戰死名聲犯臨安叅將溫如珍郤之事聞逮王仇及巡按趙洪範時名聲雖戰勝仍巧詞乞撫當道懲前事不復置討總督朱燮元至自黔以兵威撫定焉

五年普名聲死初名聲叛其兵頭何天衢不從反正自効名聲移兵攻之中砲死其妻萬氏擁衆據阿迷州與沙源諸子定海定洲通招定海爲贊婿已復殺定海而贊定洲

六年巡按姜思睿議撫萬氏所遣輒被殺廣西知府張繼孟單騎入賊營諭以利害萬氏遂降

天清順治二年九月元謀土酋吾必奎反初必奎之先爲元謀土知
縣久絕不嗣至必奎以戰功得官仍居故地自阿迷賣陣後桀
驁益甚會黔國公沐天波遣叅將李大贊屯會川以防流寇大
贊數侵擾諸夷必奎不能堪至是遂聚衆反陷武定祿勸楚雄
諸郡縣天波調各土司從大贊進剿十月大贊與土司祿永命
龍在田擊破必奎擒斬之元謀平

十二月安南土酋沙定洲反初定洲旣贊萬氏兼有安南阿迷
之衆復併吞夷地南至交岡及吾必奎反天波調定洲赴剿逗
留不進必奎已伏誅定洲始至留屯省城外不肯歸聞天波家

饒富足定洲心動陰結其左右爲內應以是月朔入城辭行率衆襲天波時變起倉卒天波由小竇出西城太夫人陳氏夫人焦氏俱自焚死天波遂奔楚雄定洲因盡得沐氏所有據省城刦巡撫吳兆元爲題請代天波鎮滇又至祿豐執家居詹事王錫袞置貢院督之與兆元傳檄各州縣旋聞天波在楚雄自率衆追之是時楚雄新爲吾必奎所破金滄道副使楊畏知奉調監軍至楚雄人留之畏知遂駐楚聞定洲西出與天波計守禦之具未集曰公在楚賊之全力聚攻城必破公不如西走永昌使楚得爲備賊卽西追恐楚襲其後留攻楚又恐公從西來首

尾牽制上策也天波從之定洲至楚雄門閉不得入爲畏知所
紿遂去遣其黨王朔李日芳等分攻大理蒙化陷之屠殺以萬
計又圍武定推官陶光印固守攻四十餘日乃去

三年定洲復攻楚雄時賊恐畏知截其歸路又聞迤東祿永命
龍在田等各自守因不敢至永昌撤兵還竭力攻楚雄楚雄守
具已集屢攻不能下畏知視賊懈輒出奇兵奮擊前後所殺甚
衆圍數月賊稍稍引去東攻石屏石屏守堅復回攻甯州破之
四年丁亥正月沙定洲復攻楚雄時定洲旣陷迤東諸郡縣又
引兵而西分爲七十二營每七營各爲一大營統之環楚城鑿

濠三重爲久困計畏知竭力固守經八十餘日糧盡援絕幾不能支會流寇張獻忠死餘黨孫可望李定國劉文秀艾能奇率殘兵由遵義入貴州龍在田使人告變且勸其至滇可望因詐稱黔國焦夫人弟率兵來復仇三月可望等入滇賊撤兵往援曲靖乃解圍去

孫可望等破曲靖及交水俱屠之執巡按羅國巘聲言欲搗定洲巢穴分兵出蛇花口定洲時自楚雄還省城聞之大懼遂殺故詹事王錫袞於貢院焚南城樓遁走臨安可望知定洲走卽由陸涼宜良趨省據雲南

五月孫可望分遣諸將徇東諸郡劉文秀屠武定李定國屠臨安還至晉甯鄉兵拒之復屠晉甯昆陽呈貢歸化

八月孫可望自率兵逼廸西楊畏知禦於祿豐之獅子口兵敗被執可望聞其名不殺誘降之畏知曰果爾從吾三事一不用獻忠僞號二不殺百姓三不虜婦女可望皆許之卽執箭對誓廸西得免屠戮畏知之力也時沐天波在永昌可望至大理以書招之天波遣子報命可望厚待天波子陰使劉文秀隨之疾馳至永昌會天波於北城樓遂攜之同楊畏知等俱至省

五年戊子八月李定國擒沙定洲及萬氏初定洲走歸臨安屯

兵尙革竈與萬氏分險自守其下湯嘉賓陳長壽等各據一山立營相去數十里爲犄角之勢私通交趾借其援以固結蠻心一日偶集於嘉賓營定國偵得之率兵遽至圍以木城因守三閱月絕其水源諸蠻懼出降者相續遂械定洲萬氏等數百人回省磔於市

六年己丑六月姚安舉人席上珍起兵討可望被執不屈死之九年壬辰二月大師取廣西明室由根奔廣南可望安置於安籠所初可望旣擒沙定洲自以無名爵難於號召滇黔聞由根稱僞號廣西遣使請封乃僞封秦王尋以僞將軍賀九儀譖執

楊畏知殺之至是由根奔廣南可望安置於安籠吳貞毓等從
由根謀通定國以圖可望值定國在廣西不能旦夕相援可望
知之遣人殺貞毓等十餘人

十四年丁酉可望自貴州舉兵入滇先是李定國由廣西還可
望聞之遣其將白文選欲先挾由根入黔文選至安籠適定國
至遂與合謀送由根入滇文選回可望欲殺之旣而釋之至是
舉兵復以文選爲總統九月李定國劉文秀逆於曲靖之三岔
口文選夜率其本部降定國可望大驚欲回兵諸將力爭乃止
可望遂密遣馬寶武大定張勝由尋甸間道襲省城潛通其心

腹王尚禮爲內應自領重兵與定國相持可望將馬進忠以其事密報定國定國與文選疾擊之可望大敗走時馬寶武大定亦密受由根劄給張勝不由閒道反出楊林至則舉火省城及曲靖皆知之悉嚴兵以待勝至省城絕內應又聞可望敗遂焚掠而逃爲定國所禽馬寶等同入滇

十月可望還貴州旋赴長沙經畧閣部洪承疇軍前歸誠

詔封義王

十五年

命安遠靖寇大將軍信郡王鐸尼由貴州征南將軍固山趙布泰由

廣西平西王吳三桂定西侯墨勒根下都統李國翰由四川三路取滇李定國白文選等連營於安籠所七星關雞公背扼險拒守大師自水西潛度七星關繞其後定國等潰敗同由根走迤西十二月大師三路會於曲靖迤東各郡皆歸附

十六年己亥正月朔大師抵雲南二月兵進迤西追殺王國勲於普淜又敗白文選於龍尾關由根至騰越州李定國復集兵於磨盤石樹柵扼險死拒大師趙布泰吳三桂力戰破之李定國走孟良由根走緬甸白文選走猛緬
三月僞將狄三品等投誠禽僞慶陽王馮雙禮來獻奉忠以撫

旨優敘三品等敘雙禮赴京安置

六月

命洪承疇至滇南議進緬機宜招撫流民爲將王會等率屬歸降景

東蒙化麗江姚安北勝鶴慶定遠楚雄永昌鎮沅弁四川烏撒

東川烏蒙鎮雄等土司悉後先歸附

九月元江土酋那嵩僞

總兵許名臣暗通李定國叛鐸尼吳三桂討平之弁獲沐天波

之子忠顯十月僞將李如碧馬寶楊國明等悉降

十七年正月

命吳三桂爲總管移鎮雲南

十八年正月李定國攻緬甸緬酋請救吳三桂發永昌騰越等處防邊兵遙應之

四月昆明妖人張鐸尹士鑣梅阿四等謀叛伏誅

五月定西將軍愛星阿公至滇大師凱旋十一月愛星阿公吳三桂領滿漢兵入緬師至木邦分兵追白文選於茶山降之弁降其黨萬人

康熙元年正月緬酋殺明宗室及沐天波等數百人大師次緬遂獻由根

八月李定國死於景線其僞將馬思良胡順都王道亨以定國

子嗣興及劉文秀子震來降衆悉平愛星阿公等班師

三年吳三桂請討水西土酋安坤安如鼎等兵次水西坤等負
固久不下三桂計擒如鼎坤走烏蒙烏撒追擒之斬於市明年
水西等處悉平

四年三月巡東土酋甯州祿昌賢新興王耀祖嶍峨祿益王揚
祖王弄王朔蒙自李白森李世藩李世屏八寨李成林糾合納
樓普率教化張長壽枯木龍元慶倘甸葉向陽葉正昌石屏龍
韜龍飛揚路南秦祖根陸涼資洪彌勒昂復祖維摩沈應麟沈
兆麟王承祖王義王先任王先倫等謀叛衆至數萬攻臨安陷

蒙自嶍峨甯州易門圍彌勒通海石屏宜良等州縣各郡震動
總督卞三元巡撫哀懋功提督張國柱發兵討之吳三桂自水
西遣王輔臣援彌勒趙得勝援石屏賊遁四月吳三桂自烏蒙
回師次第剿嶍峨新興易門等賊七月十三元張國柱吳三桂
分剿蒙自新興邱北等處克之擒王耀祖祿昌賢王朔張長壽
李成林李世藩李日森沈應麟元慶儂得功悉誅之

詔撫其餘黨李世屏曾率勢窮來降悉寬其死逃東悉平

九月蒙古侵據麗江府屬甲甸地西番二寶法王哈馬臨清格
丁等挈家來奔

十二年十一月吳三桂反初三桂收畜亡命久謀不軌適

命搬移家口逆黨胡國柱吳應期吳國貴夏國相郭壯圖衛璞方光琛方學範等密畫於內馬寶力贊於外張國柱高起隆王屏藩等應之殺巡撫朱國治按察使李興元不屈械繫於獄雲南知府高顯辰同知劉昆皆被杖安置復潛通貴州提督李本深爲接應雲貴總督甘文焜知勢不可爲謀趨守鎮遠扼賊咽喉以徵調援兵力圖恢復比至鎮遠而副將姜義先已從賊文焜父子及筆帖式何善雅圖皆死之三桂遂使吳國貴爲前鋒徑寇辰沅至荆江使王屏藩由蜀寇漢中夏國相寇江西又糾廣西

孫延齡馬雄廣東尚之信福建耿精忠同反數省騷

上命滿漢大兵討之賊不敢渡江旣而四川兩廣次第克復三桂屯兵湖南搜括糧餉滇民困憊引領以望大師

十六年吳三桂求援於蒙古割麗江江內喇普地賂之

十七年三桂死於衡州

十八年海朝龍起兵鶴慶田進學起兵永昌討吳賊不克朝龍敗由土番走京師進學死

十九年大師取貴州先是郭壯圖等因吳三桂死擁其孫世璠進屯貴州以拒大師及定遠平寇大將軍貝子章泰統征南將

軍穆占鑲藍旗叅贊都統喇賽正白旗前鋒統領薩克查巴圖
魯正藍旗都統釋迦保正黃旗先鋒統領陝納海鑲白旗副都
統蟒紀錄正黃旗副都統陶岱鑲紅旗副都統花色正藍旗副
都統公圖正白旗副都統宜思孝正藍旗副都統官保鑲黃旗
內閣學士兼禮部侍郎薩海署副都統盧崇峻經遠將軍湖廣
總督蔡毓榮江西總督董衛國建義將軍林興珠貴州提督趙
賴山西提督周卜世等滿漢官兵由湖廣克辰龍關楓木領取
鎮遠清平破僞將軍韓天福於平越十一月世璠遁回雲南

二十年正月大帥克盤江吳世璠遣僞將軍線絨屯兵江西坡

阨險以待。章泰大敗之，賊分兵據黃草壩征南。大將軍賴塔統正藍旗叅贊都統勒貝正紅旗叅贊都統希福鑲白旗叅贊都統馬齊鑲紅旗副都統洪實錄鑲白旗副都統祖植椿兩廣總督金光祖福州將軍馬九玉等滿漢兵由泗城州奪石門坎拔安籠所繞出，賊後大破之。二月，賴塔至曲靖，全城歸附，線緘始遁。章泰遂會師於曲靖。十九日，師抵雲南，吳世璠遣郭壯圖悉精銳迎戰。大師夾攻，大破於呼馬山下。賊嬰城拒守，大師圍之。時滿漢兵數十萬方以糧糗爲慮，巡撫伊闢布政使王繼文開誠遍諭，安集流移，動餉召募，萬姓踴躍晝夜輓運，未幾伊闢卒。

於軍以王繼文爲巡撫田啟光爲布政使又

命學士佛倫侍郎金鉉等馳至軍中總理糧儲四月賊將馬寶自遵
義由尋甸奔楚雄都統希福雲南提督桑格迎戰於呂合敗之
時胡國柱王緒王公良李匡等復合潰衆於池西夏國相高起
隆廖進忠王永清等潛聚於廣南大師分路搜討胡國柱王緒
李匡自殺擒高起隆等俘馬寶夏國相於京餘悉磔於市池西
廣南平八月宣威將軍紀哈里同副都統希福覺羅西布勇略
將軍雲貴總督趙良棟由建昌渡金沙江鎮安將軍都統噶爾
漢護軍統領佟雅副都統得爾德翁艾署副都統張長庚由永

甯會師於雲南十月初八日大師移營逼城賴塔進兵銀錠山
蔡毓榮奪重關及太平橋穆占趙良棟王繼文奪玉皇閣遂至
東西寺章泰策應賊悉力拒守王繼文遣人自鶴慶北勝運紅
衣礮至銀錠山晝夜攻擊賊大懼章泰等復書告示射入城中
諭以順逆賊皆有離心二十二日賊黨余從龍吳成鰲出降趙
良棟王繼文領兵攻得勝橋蔡毓榮攻大東門林興珠攻草海
賴塔攻銀錠山並分兵防近華浦四面逼城復遣余從龍入城
招撫二十八日城中賊亂線緘等擁兵入郭壯圖家殺壯圖心
腹郭得勝壯圖及其子宗汾舉火自刎世璠亦自殺線緘吳國

桂吳世基何進忠黃明等開門出降城下之日兵不血刃隨磔
方光琛方學範於市斬世璠壯圖首級並戮吳三桂屍俱函送
京師三十日章泰遣穆占馬齊入城大兵分守各門籍吳世璠
家產以

聞

二十一年以綏遠將軍蔡毓榮總督雲貴

命勇略將軍趙良棟回京定遠平寇大將軍貝子章泰征南大將軍
賴塔領滿兵暨楚粵山陝各路漢兵續凱旋

命馬齊爲鎮安將軍同護軍統領佟雅副都統得爾德希福留鎮雲

南

二十三年十月鎮安將軍馬齊領滿兵回京

二十七年七月援剿左協兵丁任二等作亂楚省兵變副將廖

貴一

陞見起行任二等遂挾黨噪叛欲肆劫掠奔合楚兵右營遊擊宣起
鳳力戰不支總督范承勲遣遊擊陳勳麥良璽及曲靖鎮中軍
遊擊張國勳等相機勦撫賊欲出不意攻靄益州承勲預檄干
總孫廷標與宣起鳳內外夾攻賊黨潰散擒任二等誅之餘悉
令歸伍亂乃定

二十九年十一月新平縣土巡檢李尙義誘集土夷數千大肆
焚掠總督范承勳檄臨元鎮總兵王洪仁援剿遊擊劉師周合
兵討之

三十年李尙義被擒自殺餘黨悉平

四十五年九月奸民李天極等謀亂伏誅

四十六年四月調官兵協剿貴州三江獵苗

五十七年八月武定府撒甸土酋常應運等挾讐相攻總督蔣
陳錫遣官兵討擒之請設兵防

五十八年二月

命都統五哥副都統吳納哈噶錫等領江甯杭州滿兵二千名駐雲
南先準噶爾賊策妄阿拉布坦遣策凌敦多布襲取西藏殺拉
藏罕湯古忒及蒙古人民驚惶奉

旨二路進兵至是五哥等赴滇駐劄以候會師進討

五十九年五哥吳納哈領滿兵二千名鶴慶鎮總兵趙坤永北
鎮總兵馬會伯領綠旗兵一千五百名及麗江土司兵五百名
進藏六月五哥等至查木道會四川兵同將軍噶爾弼前進招
撫結敦七月攻取喇里擒藍占巴丹巴招撫工布竹貢八月克
取墨竹工卡等處策凌敦多布敗走遂復西藏大兵凱旋留趙

坤統綠旗兵三百名駐防

六十年六月復

命五哥吳納哈領滿兵五百名進藏駐防副都統噶錫領餘兵回江

浙

六十一年六月總兵趙坤領綠旗兵自藏回雲南

雍正元年九月副都統吳納哈領滿兵自藏回雲南旋回江寧

十月魯魁土賊方景明等聚衆數百人攻殺獨目施和尚總督高其倬遣遊擊李化龍領兵捕之景明等逃入土戛方四陳哈巴寨內復遣人招諭之景明及方四等出降

十二月苦苦腦兒羅卜藏丹津犯西窩邊界

命雲南提督郝玉麟領兵二千名駐劄查木道

二年方景明黨普有才臧匿威遠土州尋逃入困堅箐官軍追殺獲其妻子有才遁走陳哈巴又糾合狹夷刦掠茶山一帶叅將張應宗等率兵進剿八月陳哈巴爲官軍追擊自刎死弁斬其子阿班野賊悉平

苦苦腦兒平提督郝玉麟領兵由查木道回雲南

五年正月總督鄂爾泰發兵捕烏蒙土府祿萬鍾鎮雄土府隴慶侯等時東川新歸滇轄而烏鎮二土府與東郡接壤尙隸四

川時行劫掠藏匿奸宄爲滇黔蜀邊地之患鄂爾泰親至東川檄招萬鍾慶侯出鞠二酋竟不赴質各攜印逃至四川官兵追襲其後萬鍾慶侯俱就禽以二土府地改隸雲南 鎮沅夷賊刀如珍率衆作亂時鎮沅初改土設流署府事威遠同知劉洪度初至如珍等率賊衆數百人劫掠抱母井乘夜至府城焚燬官廨刻課縱囚洪度被害總督鄂爾泰檄副將張應宗領兵討之二月威遠黑老胖等結連鎮沅叛夷聚衆肆掠焚燬鹽倉總督鄂爾泰檄叅將邱名揚等領兵追剿前後禽斬三百餘人招撫千餘戶時新平江外土賊阿達烏圖白得等亦糾賊數千

乘機仇殺楊土舍諸村寨直逼縣城聞大兵至乃遁三月生禽
刀如珍等老胖阿達烏圖白得相繼就撫 四月茶山莽芝夷
賊麻布朋等叛茶山爲車里宣慰司所轄其舍目刀正彥素懷
不軌欲奪土司世職至是陰煽諸夷爲亂總督鄂爾泰檄叅將
邱名揚等領兵進剿

六月西藏噶隆阿拉布巴等殺康濟鼐其康濟鼐下頭目坡羅
鼐帶兵報仇戰鬪相持

命雲南及川陝二省大員帶兵往藏安頓料理開化鎮總兵南天祥
領官兵駐防查木道

邱名揚遣守備李定海捕莽芝賊擊走之復遣人招撫賊黨多乞降麻布明遁匿慢了慢五諸窩泥寨官軍捕之窩泥助逆九月李定海兵至倚邦攸樂及江內各山窩泥聚衆數千人刦奪糧運進圍官軍定海連戰兩晝夜退至慢岡賊衆復自四山等內衝截官軍把總王朝選被害十二月邱名揚至蠻坡賊衆拒戰奮擊敗之賊遁走總兵孫宏本親赴倚邦督勦諸寨皆平廉知係刀正彥主使將誅之正彥逃至九龍江外乃遣遊擊雷應萬赴檄攬霸擒捕

總督鄂爾泰發兵討法戛土酋祿天佑等初天佑代其兄天祥
真繁三之一
事略

爲法裏土目擅殺東川兵懼罪詐死以天祥妻沙氏管理其地
天佑遂烝沙氏爲妻私造軍器謀爲不軌至是復遣其子刦掠
附近居民鄂爾泰檄叅將魏翥國楊國華領兵分道進剿天佑
及沙氏屯集三岔口花椒園率賊衆拒敵殺傷兵練官兵奮勇
來攻乃敗走

六年正月楊國華攻克石城各隘魏翥國亦攻破花椒園祿天
佑等奔潰入九龍箐官軍進攻復遁入多顆落

莽芝賊麻布明就擒二月祿天佑遁入老烏老雪山箐爲官
軍所獲沙氏跳崖死

三月邱名揚遣將弁追刀正彥至猛腊擒之時提督郝玉麟在茶山橄攬壘李阿先等復叛統兵討平之

烏蒙米貼土婦陸氏叛初四川磨坡長官司祿永忠早死妻陸氏贅其夫兄永孝謀襲土職未就尋以其地改隸雲南管轄永孝緣事執赴省獄有司弁拘陸氏抗拒不出至是副將郭壽域領兵三百往捕之陸氏見官軍至藏匿箐中潛與頭目立之戶吞野鷄固跨等謀劫營遣賊黨往四川吞都土千戶德昌若糾兵助逆於是月十二日攻殺毒城陸氏遁入吞都井底更總督鄂爾泰檄叅將哈元生領滇黔兵討之弁檄總兵張耀祖會兵

進勦立之戶呑等於各要隘口設滾木擂石據險拒守四月哈
元生領兵直抵呑都攻破蛇腰馬壘及門坎山五險屯諸處殺
賊數千人墮崖溺水者無算五月官軍追陸氏至牟泥箐獲之
并斬立之戶呑等野鷄固跨德昌尋亦就擒時四川雷波土司
楊名義密邇米貼與陸氏世爲婚姻賊黨多竄匿其地四川副
將張瑛檄名義赴營諭之不至其所屬部落復截刦糧運殺傷
官兵事聞

命四川提督黃廷桂統兵討之并

勅雲南總兵張耀祖領滇黔兵分路堵截鄂爾泰調兵三千助之復

令哈元生於江外防守

七月廣西西隆州八達寨儂苗顏光色作亂總督鄂爾泰檄副將楊洪領兵赴粵助剿八月顏光色爲其下所殺持首出降八達賊寨皆平楊洪等兵回雲南

九月四川兵擒楊名義叅將哈元生等撤兵回時四用阿驢土司阿資年幼不能約束夷人然頗效恭順哈元生之赴江外也留之行營候調阿資母見其子久不歸疑有變又聞元生以事鞭撻其頭目乃與阿資妻父拖科覺過等謀襲官軍是月二十二日元生還至阿驢賊衆竄出圍之數重千把總死者四八兵

亦多被傷殺元生力戰潰圍出總督鄂爾泰調諸營兵會川兵
往勦賊衆負險拒敵官軍奮勇攻破諸巢穴擒科覺過等俱就
擒梟斬

七年正月西藏平總兵南天祥領兵回雲南
八年八月烏蒙夷賊祿萬福叛先是土府祿萬鍾以事當按訊
其季父祿鼎坤覬得代襲其職率子萬福萬貴首先來歸凡所
調遣無不用命及事平改工設流授鼎坤守備赴都引

見鼎坤失望臨行與其子及頭目數十人密約在烏甸間倡亂會東
蒙鎮總兵劉起元撫馭不善萬福等遂於是月二十五日集賊

衆數千圍府城復引四川涼山蠻數萬踵至游擊劉崑馬秉倫
等力戰死起元潰圍出亦被殺於荔枝河符印皆失其他文武
官弁及家口死者甚衆大關魯甸一帶悉爲賊盤踞總督鄂爾
泰調滇黔漢土官兵分道進剿檄安籠鎮總兵哈元生總統威
甯一路中軍副將魏翥國總統東川一路弁趣雲南提督張耀
祖赴工山居中指畫九月烏賊分掠永善縣吞都土舍木谷四
哥乘釁殺阿興土千戶安永長鎮雄州逆目施額法漏亦聞風
騷動起於奎鄉叅將韓勲連擊破之又有刷刀等以逆書要約
故土府龍賄嵩妾二祿氏爲亂二祿氏不從飛馳召寨諭以順

逆賊黨解散刷刀旋亦就擒鎮雄始得無事是月十一日東川
土魯祿良珍祿承爵通於烏賊焚掠村寨進逼郡城魏翥國屢
出兵擊之賊勢轉盛道路阻梗郵遞不通翥國遣人閒行赴省
請兵鄂爾泰飛檄楚姚鎮總兵官祿往援提督張耀祖分兵策
應二十一日哈元生領兵至得勝坡賊衆二萬餘迎敵奮擊敗
之明日復戰元生臨陣親射死夷目二人官兵乘之餘賊大潰
時官祿聞東川賊衆恇怯不前鄂爾泰連檄趣之始於二十八
日進東川旋下令閉塞四門堅守不出會大軍雲集搜捕各寨
夷賊逃竄東川路乃得通十月初八日哈元生同副將徐成貞

自得勝坡進兵至以那遇賊二萬餘元生與成貞夾擊斬賊數千人遂由稻田壩過松林直抵烏蒙恢復府治隨遣將於牛欄江邊監造木筏以待東川兵至會剿十一月遊擊王先領兵渡江至魯甸適遇哈元生游巡兵爲夷賊數千人圍困內外夾擊大破之時所檄四川兵已抵豆沙關而韓勳旣連破鎮雄夷賊復進屯伐烏關爲川兵應援偵知大關賊尙衆分三路奪其砦柵諸賊奔潰遂復大關川兵亦於前一日攻克小關因會滇兵搜築殺獲無算大關旣復韓勳遣將進取永善哈元生亦檄貴州副將劉朝貴搜剿涼山一帶約至永善會合時四川遊擊王

谷宰領兵自井底過江轉戰而前斬賊二千餘級亦抵縣城十二月哈元生攻破鼠里獲東蒙鎮印信鄂爾泰令徐成貞署理隨捕擒賊首祿萬福叅將南天章亦先後搜獲祿良珍祿承爵等東蒙悉平時祿鼎坤已授河南歸德營叅將押解赴滇究訊得實與萬福良珍等俱伏誅軍功陞賞有差逮官祿下獄

九年九月

命發雲南兵一千名駐防查木道先是查木道原駐雲南兵一千後議泰甯駐兵二千已足遙應西藏遂撤回至是以馬臘奏稱查木道通藏之要路且與滇省相近仍遣雲南兵一千駐劄

乾隆五年庚申開金沙江已可行舟忽爲雷雨所沮兩岸巨石崩
壅江心董事者被逮賠帑

十六年辛未五月初六日劍川州地震壞城牆四十餘丈官署
民房三百餘間壓斃老幼一百餘口西湖水簸入東湖州牧張
泓詳請撫恤人心始安 是年冬斃茂隆廠廠委吳尚賢于獄
時尚賢貢象甫歸自京師

十七年壬申敏家破阿瓦城走緬西莽達喇

十八年癸酉緬甸木梳頭目甕籍牙起兵敗敏家莽達喇旋爲
得楞子所殺甕籍牙擊走得楞覆波龍廠逐桂家以力脅諸土

司遂篡緬甸莽氏絕

十九年甲戌莽達喇之子色亢瑞凍擊妻子族屬男婦八十餘口至猛卯謀內附文武官以聞總督愛必達巡撫郭一裕檄猛卯土司衙玳驅之出境後亦爲甕籍牙所害

二十五年庚辰甕籍牙死其子孟絡立仍與各部構兵如故二十七年壬午桂家宮裡雁爲孟絡所迫往依孟連其妻曩占與孟連刀派春構禍永昌守楊重毅誘宮裡雁送省殺之于南門月城內曩占遁去

二十八年癸未木邦降于緬助之擾邊遂犯猛籠殺去自此年

春始退

三十年乙酉孟絡死弟孟駿立揚兵九龍江上出入無忌時提督達某閱邊住思茅飛咨總督總督乃荷澤劉公藻本書生不知兵遽率師往遊擊何瓊詔奉檄巡查與賊遇爲所衝致迷歸路劉倉卒間以陣亡入奏後數日瓊詔由他道還劉張惶失措復自行檢舉照臨陣脫逃例以軍法從事旋奉

硃批豁免止予革職而瓊詔已處決多日矣劉愈恐竟于三十一年三月初三日自殺是年夏楊公應琚以次揆來任總督應琚故重臣且素習封疆旣赴普洱嚴守禦謹斥堠甫三月賊盡遁

奏授夷目叭先捧召岡爲土司防九龍江而巡撫常鈞旋有莽匪
辦竣卽辦繩匪之請蓋不知其爲一匪也于是應琚移駐永昌
年已耄而所用非人致有新街之敗賊勢大張三十二年四月
十八日本邦失守楊應琚及提督李時升皆被逮時升服上刑
應琚 賜自盡 命承恩公明瑞以將軍兼總督統滿洲兵三
千調川湖滇貴兵二萬餘大舉勦賊九月冒雨出關十一月整
隊入木邦城留珠魯訥守之給兵五千明瑞自率萬二千人由
錫箔進連戰勝賊破其十六柵遂北至象孔糧絕迷道而老官
屯額爾登額譴五格所約會剿之師失期不至遂由猛籠引還

爲賊所邀三十三年二月初十日明瑞戰死領隊大臣札拉豐
阿觀音保俱歿於陣賊仍進奪木邦珠魯訥殉楊重英被擄重
英乃應招次子官江蘇臬使先有順甯人李萬全者爲緬主謀
狡詐百出至是詡得之飭順甯府查辦不惟眷屬無存墳墓亦
莫可踪跡矣漢奸之可恨如此逮額爾登額譚五格入都皆伏
誅三十四年己丑春

命忠勇公大學士傅恒經略兵事阿里袞阿桂爲左右副將軍四月
由永昌抵騰越儲糧檢械七月二十日取道戛鳩江軍士奮勇
大小十餘戰俱破之所歷已二千餘里天暑瘴興經略染病適

緬酋以貝葉文乞降賊目渺旺模亦約哈國興入其營議事乃取成還師

三十五年經略回京復

命奏裁永昌永北楚姚曲尋四鎮其餘協營各增減有差並添麗江順寧一縣附府郭裁鶴慶府爲州歸麗江裁姚安府以姚州大姚歸楚雄降永北蒙化景東三府爲直隸廳歸迤西道元江鎮沅二府爲直隸州歸迤南道武定府廣西府亦爲直隸州歸糧儲迤東二道改建水祿勸師宗彌勒爲縣軍興後運米運軍裝夫馬浩繁無不踴躍從事然各衙門之丁友胥役浮派冒銷及

得擁貲自雄滇之民則富者貧而貧者逃至是經略面諭以奏明

皇上再不動兵之語聞者無不額手稱慶云

三十六年辛卯總督彰寶差都司蘇爾相執前約往緬索貳爲所拘自是每歲仍調兵駐邊防守

四十一年丙申孟駁死子陸腳牙立四十七年壬寅爲其目孟嘗所殺緬人殺孟嘗立孟隕蓋甕藉牙之第四子也

五十三年戊申春順甯府知府全保順雲叅將花連布據耿馬宣撫司罕朝瓊稟稱緬酋孟隕差大頭目業渺端洞齋金葉表

文馴象方物求入貢總督富綱巡撫譚尚忠以聞

高宗許之時督撫以楊重英蘇爾相未經交出難遽信奉

上諭以楊重英之出與不出無關輕重着卽將緬使于萬壽前送

赴熱河象隻貢物按站緩行六月富綱令原任廸東道賀長庚

叅將花連布通事都司翁德勝伴緬使入都俱從優賞賚九月

緬酋送楊重英蘓爾相入關重英卒于耿馬爾相入京召對知

重英並無投緬情事實給道銜赦其子楊長麟出獄並擢爾相

龍陵協副將是年三月內安南王黎維祁爲其臣阮惠所逐奔

赴廣西求救

命粵督孫公士毅率師出關會滇師合勦問罪次年之正月粵師失利滇亦撤臺還軍 戊申之八月予甫蒞劍川州儒學任軍符忽下派夫二百名時州牧張鳴鐸調署楚雄縣當孔道勢難交卸新牧李達係浪穹令兼署本任亦有應辦差務而吏目湯懋裴委董糧臺城中惟予一人大府札委代理予念劍川至馬白將三十站以實夫往口糧及安家銀費不貲若折價解局于臨安開化就近顧募殊爲兩便由四百里馳稟各憲卽奉批准並飭寫遠州縣照例通行劍川每夫折銀二十兩羽書令箭催督嚴切迨籌措完欵予已十晝夜身不貼席是舉自馬白關外共

設二十五臺總以四太守第一總則臨安府刁公玉成第二總
則大理府本公著第三總則麗江府郭公愈博第四總則楚雄
府陳師孝昇粵軍既破黎京挈黎維祁復位適己酉元旦慶春
飲至諸營驕不設備忽爲阮賊所乘廣西許提督世亨戰歿滇
師聞礮聲震天遽撤兵爭渡溺者無算兩路皆失機遂命福公
康安接辦阮光平請降乃班師

五十四年己酉春緬使細哈覺控等歸自京師六月初七夜
河陽宜良江川路南同時地震舍宇人畜俱有損傷惟昆明於
二更後忽儀衛自東來旌麾中夾以燈火擺列數里而撼聲頓

止濱海漁人皆見之次早南城之竹子巷坍屋一間壓斃百姓
萬姓二人閭境士民咸謂太和宮真武神顯靈救劫男婦驛絡
進香者逾月不絕

五十五年庚戌緬酋孟隕遣便居未駝等賚金葉表文並馴象
六隻奇異花象一隻長壽佛一尊恭祝

純廟八旬萬壽請給阿瓦封號

詔許之仍

賜詩一章

勅一道

五十六年辛亥令糧儲道永慧叅將百福隨帶知州屠述濂往
緬甸冊封六月十五日出鐵壁七月初十日抵阿瓦成禮而還
八月二十一日仍自鐵壁入開關互市約定十年一貢邊境以
甯

五十七年壬子六月委糧儲使陳公孝昇駐中甸協辦廓爾喀
凱旋兵餉十一月歲事回省

廓爾喀原係藏中屬國每歲輒以土物前來貿易今年則去年之

值率以爲常後無行番僧怙駐防勢積數年指價不與遂致仇殺班禪達賴皆奔播無狀先于辛亥春調滇兵會勦觀音山等處俱已設臺旋以道遠撤回至是始平海公蘭察績爲最偉

五十九年甲寅五月滇垣陰雨兼旬海水漫溢巡撫費公滄率

屬步禱天霽水旋退歲仍有秋癸五春咨訪紳耆濬六河開海
口至是水泛時不
大爲患民兼德之

嘉慶二年丁巳黔苗煽亂擾及羅平師宗等處滇省戒嚴巡撫江
公蘭出駐曲靖沿邊俱被焚掠後以苗首韋七絡鬚被獲餘黨
烏獸散遭時疫死亡略盡滇中諸教職以予由軍功保舉紛紛
投効如鄒君有後劉君梓竇君欲峻
張君守恆皆是也惟胡君芳
蒲以勞瘁卒於軍邀恤典

三月之二十三四等日蒙化太和鄧川趙州雲南永北鶴慶浪
穹楚雄大姚元謀定遠祿豐等處以壓鹽致變縛官親門丁蠹
書兇役及本地紳衿之爲害者挖眼折足或烹投之積薪中慘

不可言

滇鹽原係官銷而坐井丁書違例買私自圖沾潤尚不至大爲民累自署提舉某在本井攏和灰土溢報餘鹽

幾倍正額主者善之於是銷鹽之地以餘鹽之多寡爲殿最反置額鹽于不問始則計口授食繼則按戶分攤始則先課後鹽繼則無鹽有課各屬士民訴之大府大府故商籍左祖州縣而州縣之昧良者深以士民爲仇追比愈急或立斃于庭或羈死于獄呈控督撫仍批州縣遂至釀成此禍一二日間十餘郡邑不約而同蜂擁蟻聚呼聲如沸鼎惟不敢犯官所構者必厯數其害民實跡取具親供然後肆毒氣稍平摘辦十許人以販私仇殺會奏定案有死者有徙者而其所以徙所以死亦死者徙者有以自取也天乎人哉

七月廿六石屏等處地大震石屏較重直至戊午春搖動無甯
日人皆露宿被難者數千餘口除請帑撫恤外各紳衿捐貲賑
粥編戶得免流亡

四年己未十二月巡撫初公彭齡

奏鹽務歸民由井收課並

定夫馬章程滇人大悅

正月今言事時

皇帝旣親政詔許司道專摺

務入

告總督富綱心亦內悔方擬更定而谷侍御際岐已達

章具奏命將原摺發滇閱看當路者

已

也曰邊省人又復多嘴

耶遂置不理

十月初中丞抵任採訪輿情卽據實妥議以聞隨

奉俞旨令下後繩綯之苦絕於道暮夜之呼絕于門舉三十

年之黑霧積陰曠然得覩天日雖深山窮谷中之老婦孺子無

不

曰今活我今活我惟望繼此者守而無替滇之幸亦

國家

之幸

也

也

八年癸亥維西力些藤鮑蟀糾衆作亂總督瑯公玕駐劍川集

兵剿之逾年始授首餘衆咸就撫

藤鮑蟀知醫藥所治病旣愈只博酒食却錢幣諸夷咸相

親愛駐防某干總嚇以邪教得賂方止已非一次繼之者大有所欲誘而繫之空室干是夷衆憤怒持械刦之去駐防以作亂

報維西協副將卽令千總以兵五十往拒捕反鬪傷兵十餘人
並殺千總事遂不可已夫朝廷設駐防原爲保民乃以數千
之生靈數萬之庫帑徒供未弁之
一激司其事者蓋亦返而自審哉

師範曰此亦編年體耳數千載之往蹟彙而次之一冊雖所
考貴精而所裁尤貴當若歲比而月計之可以汗牛矣中用
夾注蓋古人發明補傳之遺意閱者欲知其詳有全繫在分
門而索之可也丁卯中秋前十日



